

Ri rox carta ri xutz'ibaj can ri apóstol San Juan

Ri utzilej rubanobal ri kach'alal Gaio

¹Yin Juan, ri uc'uey quichin ri kach'alal, nintek c'a el re carta re' chave rat vach'alal Gaio.^a Roma avetaman chi kitzij yin can yatinvajo-vi.

²Vach'alal ri janíla yatinvajo', ri nurayibel yin ja ta chi rat utz ta at benek riq'uín ronojel, y manek ta ayabil. C'o ta jun ac'aslen ri can utz vi. Can ta achi'el ri at benek riq'uín ri ac'aslen ac'uán chuvech ri Dios. ³Y jari' banayon chuve chi janíla quicoten c'o pa vánima,^b roma ec'o kach'alal ri xetzijon can chuve chi can kitzij avojkan ri ruch'abel ri Dios y can utz ri c'aslen ac'uán. ⁴Y ronojel bey tok ninvac'axaj chi ri kach'alal ri e achi'el valc'ual,^c can kitzij cojkan ri ruch'abel ri Dios, yalan quicoten nuya' pa vánima. Roma can man jun chic c'a ri niyo'on ta más quicoten pa vánima.

⁵Vach'alal Gaio, riq'uín c'a ri utzil ri yatajin chubanic, can nac'ut c'a chi can acukuban ac'u'x riq'uín ri Dios. Rat can achapon c'a quito'ic ri kach'alal ri ec'o pan atinamit y que chuka' ri' naben quiq'uín ri kach'alal^d ri yepe nej. ⁶Y rije' can xquitzijoj chique ri kach'alal tok quimolon-qui'. Xquitzijoj ri ajovabel ri c'o pan avánima. Romari' yin ninc'utuj c'a utzil chave chi ronojel bey tok yek'ax aviq'uín, taya-el ri nic'atzin chique. Roma can niquben ri rusamaj ri Dios. ⁷Rije' quichapon bey richin niquitzijoj ri rubi' ri Jesucristo chique ri vinek ri man jani quiniman ta, y man quic'utun^e ta c'a quito'ic chique ri vinek ri'. ⁸Roma c'a ri' nic'atzin chi ja roj ri yojto'on quichin. Y riq'uín ri', roj chuka' nikaben ri rusamaj ri Dios, roma yekato-el tok e benek chutzijoxic ri kitzij.

Ri man utz ta ri nuben ri Diótfrefes

⁹Xintek yan el jun carta chique ri kach'alal ri niqumol-qui' pa rubi' ri Dios chiri' pan atinamit. Pero ri Diótfrefes man xunimaj ta ri xinbij, roma

a Hch. 19:29; 20:4; Ro. 16:23; 1 Co. 1:14. b 2 Jn. 4. c 1 Co. 4:15; Flm. 10. d Ga. 6:10.
e 1 Co. 9:14, 15.

can runimirisan-ri' y nika' chuech chi ruyon rija' ri uc'uayon quichin ri kach'alal. ¹⁰Roma c'a ri' vi xquinapon iviq'uin, xtinbij chiquivech ri kach'alal ri nuben rija', ri yerubila' chikij y xa man e kitzij ta.^f Y man xe ta ri' ri yeruben. Chuka' man yeruc'ul ta ri kach'alal ri yek'ax riq'uin. Y man nuya' ta chuka' k'ij chique ri ch'aka' chic kach'alal chi yequic'ul ta ri ye'apon quiq'uin. Y vi man niqunimaj ta rutzij, yerelesaj-el chiquicojol ri kach'alal.

¹¹Vach'alal, ri yalan yatinvajo', ninbij c'a chave: Man tavojkaj ri itzel.^g Xa tavojkaj ri utz.^h Roma ri nibanon ri utz, can c'o chic c'a apo riq'uin ri Dios.ⁱ Jac'a ri nibanon ri itzel, man retaman ta ni ruvech ri Dios.

Ri utzilej ruc'aslen ri kach'alal Demetrio

¹²Conojel c'a yebin chi ri ruc'aslen ri kach'alal Demetrio, can utz.^j Ja chuka' nikabij roj. Y rix ivetaman chi roj man nikatzt'uc ta tzij.^k Rija' can kitzij rojkan ri ruch'abel ri Dios.

Ri ruq'uisibel tak ch'abel

¹³C'o q'uiy ri ninvajo' ninbij chave. Pero man ninvajo' ta nintz'ibaj más chupan re carta re!^l ¹⁴Roma xa ninrayibej chi yinapon yan aviq'uin^m y c'ari' c'a xkojch'on c'a chirij ri'.

¹⁵Xtic'oje' ta c'a uxlanen pan avánima. Ri kach'alal ri ec'o vave' niquitek-el rutzil-avech. Y rat tabana' c'a utzil taya' rutzil-quivech chiquijujunal ri kach'alal ri ec'o chiri'.

f 1 Ti. 5:13. g Sal. 37:27; Is. 1:16, 17. h 1 Co. 4:16; 11:1; 1 Jn. 2:29. i 1 Jn. 3:6. j 1 Ti. 3:7. k Jn. 21:24. l 2 Jn. 12. m 2 Jn. 12.